

In pelegrinadi d'otra sort

DA ZEGNA PITTET-DOSCH

■ **Far pelegrinadi è per in Surmiran nagin'expressiun estra. Almain ina giada ad onn stoppian ins avoir vis l'altar cun la Nossadunna da Ziteil – s'enclegia a Ziteil, uschia segund l'avis d'ina gronda part dals Surmirans.**

In'idea che plascha era a mai persunalmain. Ils davos onns hai jau però era pudi far mias atgnas experientschas cun in pelegrinadi d'otra sort.

Uffants pitschens sajan laders da la sien dals geniturs. Quai na poss jau betg suttascriber, ils temps da pops dals mes eran pli u main accompagnads cun notgs quietas. Pir pli tard, cura che las chommas als tegnevan ed il stgir da la notg als fascheva nagina tema pli, èn sa mussads ils tratgs da laders. In pelegrinadi saja in viadi tar in lieu sontg ed ins fetschia in pelegrinadi per sa spruvar da vegnir deliberà dals putgads, vegn declerà. Il lieu sontg per mes uffants è nagliur auter ch'il letg da mamma e bab. Enten quel letg saja quai uschè bel chaud, han els declerà, uschè bel ch'ins possia durmir meglier.

Nus n'avain mai fatg in drama u in teater londerora. Tgi che vegneva era bainvegnì. Enfin tar in tschert punct,

quel tschert punct che fascheva dolurs als geniturs la damaun, quel punct ch'era nagut auter ch'in muscul maltractà dal dies. Bab e mamma levavan la damaun e sa sentivan manaivel a tschient, gobs e steris. In letg grond, occupà dal tuttafatg d'in nanin da maximal in meter. Da mintga vart, dapli decoraziun che recreaziun, anc ventg centimeters per mamma e bab. Il plaz gieva anc, che la persuna pitschna aveva il basegn da gest duas cuvertas grondas, era betg pli chapibel.

Qua stueva nà in'otra schliaziun. Ina nova cuverta per il nanin – nagin effect, in nov letg per il nanin – nagin effect – in'emprova da scumond – nagin effect. Capitular e quai cun grond effect. Nus avain pusà ina matratscha supplementara giun plaun. Quintada sco lieu da pussar da guntgida per ils muscels da dies maltractads è quella però directamain vegnida conquistada da las chommas curtas. La fin finala ha il viadi nocturn l'effect da pelegrinadi. Il sentiment da cuntentientscha sumeglia quel che nascha, cur ch'ins vesa nà da la spunda stippa dal Curver la baselgia da Ziteil.

L'autura è magistra